

Process politic en Madrid

Persunalitads catalanas avant il Tribunal suprem

DA GUIIU SOBIELA-CAANITZ

■ **A Madrid avant il Tribunal suprem dal reginam ha cumenzà il process da duodesch persunalitads dal moviment per ina Catalogna independenta, numnadamain diesch anteriurs commembras e commembers da la regenza catalana e domadus parsuras da duas organisaziuns politicis.** La Procura publica pretend in chasti da detenziun da 25 onns per Oriol Junqueras, anteriur vicepresident da la regenza catalana, e 17 per Carme Forcadell, anteriura presidenta dal parlament catalan, sco era per mintgin dals dus parsuras d'organisaziuns.

L'autorità moralà dals accusads

En la «NZZ» dals 12 da favrer (p. 11) crititgescha redactor Andres Wysling cun arguments originals: «Il process da Madrid cunter ils manaders dals separatists (...) è atgnamain politic, e quai segund differentis

aspects. El tracta in delict politic: La realizaziun dal referendum illegal dal prim d'october 2017 en Catalogna. Lez delict han ins numnadamain commess perquai che las instanzas politicis na chattavan nagina soluziun politica. La questiu da la Catalogna n'è anc adina betg schliada; gnanc ils derschaders na vegnan a chattar la storta. Il process giuridic vegn ad influenzer il process politic – e viceversa. Ad ina part dals manaders renfatscha la Procura publica ch'i hajan rebellà; i duessan perquai svegnir painas da praschun uschè grevas sco pussaivel. Ma lez causal penal premetta il diever da la violenza. Ils accusads èn però adina sa pronunziads cunter accziuns violentas (...). La Procura publica sustegna la reproscha da rebelliun, la represchentaziun da la regenza percuenter betg: Igl è ina renfatscha absurda. Politica è era la lunga detenziun preventiva dals accusads, decretada e mantegnida cun il pretext d'in privel da fuga: Ins leva als far tema ed impedir ch'i sa mussian

publicamain (...). La detenziun ha rinforzà lur autorità moralà: La premura excessiva da la giustia ha stgaffi martirs (...). La pressa da Madrid, perfin gasettas renumadas, na disfamescha mo ils separatists catalans, mabain la Catalogna insumma», pia ina cuminanza da passa 7,5 milliuns olmas.

Onn d'elecziuns en Spagna

«Le Courier» (Genevra) dals 13 da favrer punctuescha «la réputation dégradée de l'Espagne» (p. 7). Il process duai dudir passa 500 perditgas e durar almain fin il fanadur; tranteren, gist suenter Pasca, duai l'entira Spagna (passa 46 milliuns olmas) eleger in parlament nov. Ins sto pia spetgar ina primavaira da tensiun. «La partida da la dretga extrema 'Vox' vul profitar da l'occaziun per transformar il process en ina tribuna politica avant las elecziuns localas ed europeicas dal matg» («Le Monde», Paris, 12 da favrer, p. 4) sco era gia per las naziunals dals 29 d'avrigl.